

## ■ CONVIVENZA

# Ina pandemia en cuschina

DA VIOLA CADRUVI\*

**D**api in temp n'è la vita betg pli la medema. Mes mintgadi è mess sutsura. I dat mo anc in tema. Mez da mes chau è adina occupà e nagin di passa senza ch'jau ma fatschentia cun questa chaussa. Tuttenina gira tut enturn ella. Ed jau tschent cun ina giada en dumonda ina massa. Sun malsegira. Tge dastg'ins? Tge na dastg'ins betg? Tge è uss responsabel?

**J**au discutesch cun amis ed amias, cun enconuschents e betg enconuschents. Analog e digital. Survegn cussegls buns e main buns. Dapertut chatt'ins recumandaziuns. En l'internet, en brochuras, il palpìri sa mantuna ed jau na sai betg pli tge tips suandar.

**C**o dumagnar? Tge salvar, da tge sa disfar? Ina dumonda suonda la proxima e tuttenina sun jau pigliada en ina bubble dad infurmaziun, dischinfurmaziun ed irritaziun. Plain disgust, ma era cun ina purziun fascinaziun observesch jau ils schabetgs, il progredir. Jau ballantsch tranter acziunissem e laisser-faire e ma dumond co che tut quai duai sa sviluppar en il futur ...

**T**ut mo pervia da quella stoda chamulaunas da mangiativas! Cura ch'ellas èn entradas en mia vita, eran tuttenina tut mes



plans invans. Atgnamain leva jau ir a far ina bella spassegiada, giudair ils davos bels dis da l'atun, fors baiver insanua in café. Ma lura hai jau remartgà questas pitschnas cogas en il glas cun ils sems-zitga e n'hai gi nagina minuta pli en paus.

**L**'emprim na saveva jau l'gea gnanca cun tge ch'jau aveva da far. Jau era simplamain totalmain disgustada. Per chattar ora da tge ch'i sa tracta (e per parter in pau mes disgust) hai jau tramess vinavant in pitschen video ad enconuschents ed enconuschentas. Las reacziuns vegnan prontamain:

**U**ääh! – Quai èn chamulaunas da mangiativas. – Haha, bun divertimento, uss poss schubregiar mintga chantun da la cuschina! – Oumann, uss poss strair davent tut las mangiativas che vus avais a chasa. Té, farina, müesli, nuschs, spezaria ... – N'abita vus betg en in'abitaziun veglia? Quai vegn stoda stentus da vegnir ora cun quels tierlis.

**U**schia ha il circus pia cumenzà. L'emprim na leva jau betg crair che quai saja tut talmain nausch. Tge teater pervia d'in per insectins. Lura hai jau dentant cumenzà a googlar. Las malsegirtads èn vegnidadas pli grondas. Mintgin aveva auters tips tge che gidia. Schubregiar cun aschieu, cun savun, segir betg cun aschieu, mo cun aua. Metter si traplas u duvrrar vespras satiglias, bittar davent tut las mangiativas u mo quella cun en chamulaunas. I suondan notgs senza sien. Stgatschar, procrastinar, observar tranter daletg e disgust co ch'ils animalets sa multiplitgeschan, far vinavant, ma mai entiramain libra en ils patratgs.

**L**ura è vegnì il punct ch'jau stueva la finala far insatge. Acziunissem brutal era la conseguenza. Jau hai schubregià mintga chantun. Cun aschieu, savun ed aua. Ma cun quai n'eri betg a fin. I suonda la dismessa da tut las bellas mangiativas, la chatscha desperada cun il mazza-mustgas, la segunda unda da schubregiar, tschentiar si fallas, il spetgar, la malsegirtad, la tema d'ina nova pandemia. Tgi sa, sche tut quai smetta insacura.

**\*Viola Cadruvi ha studegià germanistica, istorgia e rumantsch a l'Università da Turitg. Mintgatant lavura ella vi da sia dissertaziun e mintgatant sco scolasta, ma bunamain adina scriva ella.**

**La «Convivenza» cumpara mintgamai il glindesdi en la «Südstschweiz» ed en «La Quotidiana».**